

CLARISSIMO,  
 ERUDITISSIMOQUE  
 D. D. JOANNI CAPERONNIER,  
 GRÆCARUM LITTERARUM  
 LECTORI REGIO,  
 BIBLIOTHECÆ REGIÆ CUSTODI,  
 REGIÆ HUMANARUM LITTERARUM ET INSCRIPTIONUM  
 ACADEMIÆ SOCIO.

CLARISSIMO  
ERUDITISSIMO  
D. D. JOANNI CAPRONIERI  
GRACIARUM LITTERARUM  
LECTORI REGIO  
BIBLIOTHECA REGIA CUSTODI  
REGIS HUMANARUM LITTERARUM ET INSCRIPTIONUM

ACADEMIE SOCIO





D E  
EMPHYSEMAE.  
THESES  
ANATOMICÆ ET CHIRURGICÆ.

I.

**M**USCULOS inter & cutem inclusus atque expansus aer, illum efficit morbum, quem à Græcis accepto nomine, Emphysema dicimus. Distenta cutis, non mutato colore, tumorem offert pellucidum, mollem sed elasticum, qui pressus vix cedit, remotoque premente digito, priorem statum & magnitudinem & formam recipit. Sublevantis cutem aeris receptaculum & sedem norunt omnes esse telam cellularem præsertim subcutaneam. Ea vero tela rete est insensile, ex fibris constans & laminis hic crassis, illic tenuioribus, mirum in modum inter se inclinatis, implicitis decussatisque, uno verbo ita dispositis, ut spatiola seu loculos efforment inter

A



se communicantes. Per totum corpus dominatur, per musculos, per viscera. Toti cuti non solum substernitur, eamque inter & partes subjectas consortium instituit vitæ necessarium, sed in infinitas divisiones crescens, musculos circumcingit omnes, à se invicem secernit singulos eorum lacertos, singulas ambit & vestit fibrillas; vasa denique & nervos complectitur, & eis firmitatem addit, nihil mobilitatis detrahit. Porro ubi plures sibi impositæ tunicae cavum tubum efficiunt, ibi totidem cellulosa retia eas distinguunt & uniunt; exempla in arteriis, venis, ventriculo, intestinis, vesica urinaria & alibi præsto sunt. Hanc ergo telam cellulofam, membranam corporis universalem merito dixerimus, quæ mirabili sua textura, multiplici & tortuosa propagine latissime patet cum suis cavernulis, & undique ex una ejus sede in aliam regionem ita pervia est, ut aer, aut fluidum solidum-ve corpus ex quacunque corporis animalis sede in aliam quamlibet partem etiam remotissimam, fluere & promoveri possit. Hæc eadem cellularis substantia, singulis partibus corporis suam impertit certam firmitatem ad fines utilissimos. Ea enim remota, nervi, muscoli, vasa, membranæ vacillant undique. Eadem membranas inter se revincit, & robur conciliat intestinis, ventriculo, receptaculis omnibus. Figuram & flexiones variis dat partibus, vesiculæ felleæ cervici, vesiculis feminalibus, intestino cæco, valvulæ coli, arteriis venisque. In ejusdem telæ spatiolis adeps effusus habitat; mollis, levior aqua, & dum vivit homo vere fluidus, cruentus in ossibus extremis. In sanguine contentus, per poros arteriarum in telam cellulofam insinuat, tum in venas rubras transit, aut etiam per cutem dissipatur: neque enim finis esset obesitatis, nisi resumeretur.

Telæ cellulari superincumbit cutis, quæ licet negligenter intuenti interrupta videatur, continua tamen ubique est: at in cavitatibus aurium, oris, narium, ani tracta, paulatimque mutata, eas vestit cavitates. In universum, eadem est ejus textura quæ membranarum: ex filis nempe, laminisque brevibus, intricatis, arcte coherentibus, contexta. Densior exterius, interius tenuior sensim laxatur, minuitur, ut continenti serie in telam cellulofam definat, neque usquam certi utriusque limites sint. Ejus varia est densitas & durities: tenera in palpebris, genis, labiis, mammis mu-



lierum, præputio; durior in cranio, patientissima extensionis quæ lente fiat, ut in foeminis gravidis, in obesibus hominibus, hydropicis, observatur. In ea nihil tendinosi, nihil aponeurotici aut ligamentosi reperitur. Arteriis, venis, nervisque plurimis scater. Nervi enim adeo numerosi sunt, ut nulla sit pars cutis cujus sensus non sit acerrimus. Neque ipsa fibras recipit musculares, neque ejusdem naturæ vis est in cute irritabilis, quæ in musculis; etsi frigore riget ac contrahitur, stimulis tamen non obedit.

## I I.

EMPHYSEMATIS materiem, collectum & expansum sub cute aerem jam diximus. Fluidum illud quod merito *Catholicum, efficacissimum* Hermannus Boerhaave (1), vocavit *instrumentum, quo imprimis universa natura utitur ubique in omnibus suis operibus quæ perpetuo exequitur*, eximiis donatur qualitatibus, nulli in rebus physicis non plane peregrino, non notis. His omnibus recensendis superfedemus, quo citius ad morbum qui agitur, deveniamus. De virtutibus quæ ad institutum nostrum pertinent, pauca dicere sufficiat. In triplici regno nullum proponi potest corpus, cujus inter elementa non hæreat aer, cujus vitæ non inseruiat. Is enim maxime & perpetuo fluidus est, gravis, elasticus. Attamen elaterium sibi innatum & adeo proprium, partim amittit non difficulter multis modis, & imprimis ubi in fluido corpore immergitur, aut adhæret elementis solidi corporis, tum etiam per admistos vapores varios, tuncque in fixum ex elastico statum transit. Aer ita divisus, per liquores spargitur, ut singulæ partes inter se jam non cohæreant. Restituitur autem in elasticam naturam per putredinem, per fermentationem, per calorem majorem qualis est ebullientis aquæ, per gelu constringens quod glaciem producat, per liberationem ab aeris externi comprimente pondere, quæ fit subtracto aere. In universum igitur inspiratus aer, & in homine & in animalibus, maximam partem elateris sui amittit: halitus enim pulmonalis qui copiosissime miscetur aeri elastico inspirato, aquosus est, aqua vero sine

(1) Element. chem. de Aere.



elaterio. Aerem plurimum continet sanguis, plurimum lymphæ, plurimum cæteri corporis humores : at ille fixus est & ita dissolutus in aqua sanguinis, ut nunquam sub forma bullæ appareat, fere omnino naturam elasticam non exferat, ibique non videatur agere ut aer. Qui vero bullarum specie, in vivorum animalium sanguine visus est, aut in cadaverum venis, is per vulnera subit, aut putredinis effectus esse potest, quæ aut à morte accesserit, aut in ipsa jam vita cæperit nasci. Huc etiam referenda est mors illa quæ immisso in quadrupedum venas aere, contingit. Hinc quoties bullæ majores aeris in venam inflantur, mors continuo fere succedit, quod eæ bullæ vi circuitus in pulmones pulsæ, sanguinem circumitum retineant, quominus in sinistram cordis ventriculum & aortam veniat, totusque adeo animalis cruor in pulmone & cordis dextro ventriculo, collectus & coactus congeratur, vasaque rumpat. Per humorum inhalantium vias, aer in sanguinem deferri potest. Ergo cum vapore quem pulmo habet, advenit aer, & cum chylo & cum cutanea inhalatione, cæterum ad penetrandam cutem parum idoneus. Qui inspiratus, cum aqua miscibilis, eo facilius ad sanguinem venit, quod vapore pulmonali elaterium amittat ; fiat resolubilis, fixumque in statum transeat.

### III.

NASCITUR Emphysema multis modis : causa enim illius multiplex est. Et primo quidem aer de industria sub cutem missus, aut infelici casu, per totum corpus diffuere potest, tumoremque undique continuum excitare, si quocunque modo exitus ipsi negatus fuerit quo foras erumpat. Eo enim artificio, mendiculi quidam scroto sibi ipsis libenter perforato, eoque multo aere turgido, juxta vias videndum exponebant prætereuntibus, eos miseratione permoturi (1). Eadem, at innocentiori, fraude, fetus siccatos, ne monstrosa facie displicerent, impulso sub cutem aere, in teretem figuram restituere solebat Fridericus Ruysch (2). Neque de fuit scelestus homo qui proprii filii caput ad utris similitudinem inflabat, ut hydrocephalum arte imitaretur & inde

(1) *Dionis* operat. Demonst. IV.

(2) *Adversar. Anatom.* 2, N°. X, p. 28.



quæstum sibi faceret : sic & infelix ille miles à nefariis lationibus, tubulo in vulnus inguini inflictum immisso, insufflatus ita intumuit, ut nisi collum sibi ipsi cultro aperuisset, occubuisset suffocatus (1).

Iterum etiam ubi magna contusio inflicta est alicui corporis parti quæ copiosam telam accipit cellularem, tum imprimis in scroto, in capite, juxta collum, thoracem, scapulas & renes, tunc disruptis vasis, ab effuso liquore separatur aer qui, gangræna jam incipiente, calore loci rarefactus, totam corporis superficiem dilatabilem celeriter perambulat, totam undique à musculis cutem divellit & distendit : neque moram facturus, musculorum intervalla subit, & fraudulente torosam hominis speciem repræsentabit.

Longè frequentius tamen post pulmonis vulnera, id morbi genus sequitur. Aer enim inspiratus, omni momento pulmone vulnerato elabitur, in telam cellularem subcutaneam, tempore expirationis, aspirat, & per totum corpus dispergitur non difficulter : maxime autem si pulmo ad costas adhæserit, & vulnus obliquum fuerit & clausum. Ex fractis costis quæ pulmonem laceraverant, Emphysema totius corporis, planta pedis, volaque manus exceptis (2).

Post vulnus thoraci inflictum, etiam illæsis pulmonibus, Emphysema supervenire vulgo notum est, si aer exterior cavum pectoris ingressus, singulis deinceps respirationis motibus expellatur quoad usque telam cellularem elasticus subrepat. Aliquoties demum asperæ arteriæ vulneribus Emphysema oboritur, imprimis eo quod labia vulneris inæqualiter juncti, intus dehiscunt scissa, extrinsecus vero recte coeunt, ita ut aer qui foras erumpere tentat, cogatur per subcutaneas cellulosas telas vagari errore certo. Ex vulnerata aspera arteria, Emphysema universale (3).

Neque eadem via, neque simili modo, morbus idem evenit ubi spiritus fere omnis intercluditur, ob corpus extraneum infelicitè in asperam arteriam demissum quod eam obturat; hoc in casu, aer, disruptis violenter vesiculis aereis, se insinuat in textum pulmonis interlobularem, quasi errore loci, spatia infarcit cellulosa, secus bronchia & ipsam

(1) *Sauvages*, Nosologia Methodica : classis X, T. 2, p. 468 & 497.

(2) *Acad. des Sciences*, an. 1713.

(3) *Amb. Paré*, liv. X, ch. XXX.



asperam arteriam progrediens, per collum deinceps, linguam inter & gingivas, quod signum est inflationis aeræ pulmonum, aditus quærit cellulosos, exterior demum verum Emphysema repræsentaturus (1).

E putrescentibus corporibus tum solidis, tum fluidis, aerem valde elasticum, aut saltem quid aeri elastico omnino simile abunde extricari notum est. Ab hoc igitur fluido elastico suum habet ortum tumor flatulentus, elaterio insigni præditus quem in morbis putridis haud raro observamus. Emphysemata gangrænosa manifesto à putredine fiunt; & cadavera submersorum, dum incipiunt putrescere, distento toto corpore & imprimis abdomine emergunt (2).

Aliæ iterum observantur Emphysematis species quæ vel ad cachexiam, vel ad putriditatem humorum, vel ad meteorismum pertinent. In bibliis enim medicis recensetur pneumatosis hysterica, febrilis, verminosa, intestinalis & abdominalis quam ibi tympanitem dicunt; tum etiam à veneno, à morfu colubri, à variolis, rachitide, scorbuto, à lochiis suppressis, à bilis extra cystidem effusione ob vulnus inflictum, &c.

Pneumatocelem denique non ita accipimus ut ab aere fiat intra tunicam vaginalem & albugineam incluso, quemadmodum aqua stat in hydrocele, sed ut ab aere scroti cellulas distendente, tuncque vulgo non sine cæterarum omnium, aut certe proximarum scroto partium Emphysemate conspicitur.

(1) Mem. Acad. Chir. T. IV, p. 538.

(2) Emphysema gangrænosum scroti, perinæi & abdominis in puero; ab effuso ex urethra inflammata, disrupa, per vicinas cellulosas telas lotio. Saviard, obs. chir. 87. Molitori sano, robusto, lethale vulnus in epicolicam regionem, lanionis cultro infligitur. Eo quadragesima circiter hora ab accepto vulnere, mortuo, abdominales muscoli pertusi viscebantur & inter eos aer, e vulnerato colo intestino in cavum ventris egressus, cum effusis excrementis. Morgagni de sedibus & causis morborum. T. IV. Epist. LIV. p. 137.

Adolescens dysenteria correptus cum febre continua, acuta, mentis stupore, surditate, dejectione putrida, moritur. Ventre aperto intestina pluribus in locis perforata, erosa, exulcerata, cum ichore sanioso in ventre & in intestinis. Omnes venæ aere multo turgidæ, cum sanguine pauco. Magna vis putredinis apparet in hoc cadavere, ex tanta aeris qui se evoluerat copia, relata in sanguinem ex intestinis vitiata materia. Morgagni, de sedibus. T. III. Epist. XXXI. p. 42.



Quid faciat Emphysema diximus, quid illud tollat nunc proponendum est. In universum, Emphysemata paulatim evanescent, si leviora sunt, amissa aeris elasticitate, aut etiam ipso resorbto. In sanatione vulnerum thoracis aut abdominis penetrantium, necesse est aerem qui receptus est, vim suam elasticam deponere, qua alioquin pulmones aut viscera abdominalia graviter comprimeret: lata pulmonis superficies etiam certissime sorbet aquulam de thoracis cavea, nam odor & sapor medicamenti vulnerarii in cavum pectus effusi in ore percipitur.

Propterea tamen ne existimes admissum aerem in cavum thoracis aut abdominis post institutam paracenthesim ad proliciendum aquas aut pus aut sanguinem, ibi semper innocuum esse, imo potius perniciosum credideris: non enim contra obloquentis experientiae testimonium dicere potes. Sive à contusione, aut à vulnere fiat Emphysema, dissipatur per frictiones, per moderatam pressionem, per deligationes continuo adstringendas quæ aerem è cellulosa tela versus plagam expellant. Profunt quoque fomenta calida, spiritiosa, aromatica, ut acetum, aqua vitæ camphorata & alia extrinsecus imposita remedia quæ curem & cellulosa telam foveant & stimulent. Quod si vehementior noxa est, & suffocationis periculum instat, & tussi humida fatigatur æger, ut spirare sine sono & anhelatione non possit, ad id venæ sectio sæpius instituenda est, prout ratio postulat, & potus pectorales propinandi sunt; at imprimis passim incidenda est cutis etiam aliam in partem ubi vulnus inest, ut quidquid aeris intus præclusum est, sensim sensimque expellatur. Maxime igitur vulnus ampliandum quod aerem admisserit, si parvum, si obliquum, ut recta patulaque via, aer liberius eo deducatur. At, si pulmone vulnerato, simul etiam spiritus feratur per substantiam interlobularem, quasi errore loci, tunc oritur insanabilis suffocatio quæ breviter agrotanti vitam eripit; si vero id mali eveniat ab occlusa larynge quæ corpus extraneum receperit, citius ad bronchotomiam deveniendum est.

Curatur ergo Emphysema vel aeris destructione, vel ejus emissionem: utrumque præstat mox indicata curatio. In vulnere



pulmonis, ut completa sanatio obtineatur & aer è bronchiis aut vesiculis apertis non amplius foras exeat, eas inflammari & ad partes vicinas agglutinari oportet, quod naturæ opus est. Ubi autem aspera arteria læta est & Emphysema supervenit, vulnus ampliandum, & eadem omnino facienda quæ, mox proposuimus. Quæ simul ad curationem horum ce vulnerum proprie pertinent, curiosius agenda sunt. Putredine natum Emphysema curatur, adhibitis remediis anti-septicis quæ ulteriorem putredinem inhibeant. At curatio prima est morbum ipsum qui Emphysema prodaxerit, solvere; illud enim non per se incipit, sed alteri morbo supervenit qui prius suis remediis finiendus est. Neque semper sanat emissus aer, sed medicinæ locum facit quam intus inclusus impedit.

*Has Theses deo duce, & præside M. PETRO LASSUS, Artium & Chirurgiæ Magistro, Anatomes & Chirurgiæ Professore in Schola Practica, tueri conabitur, LUDOVICUS GOUILLART, Mondiderinus, Magister Artium in alma universitate Parisensi: Theseos Auctor.*

*PARISIIS,*  
IN REGIIS CHIRURGORUM SCHOLIS,

*Die Sabbati secundâ mensis Junii, à sesqui-secundâ post meridiem  
ad septimam, anno R. S. H. 1770.*

PRO ACTU PUBLICO  
ET MAGISTERII LAUREA,

---

Typis P. AL. LE PRIEUR, Regii Chirurg. Collegii Typographi,  
1770.